

Jumaat : 25 November 2011

Edar dadah 3.45 kilogram

Oleh JAMLIAH ABDULLAH
utusan kedah@utusan.com.my



DUA daripada 10 lelaki yang dituduh mengedar dadah dihadapkan ke Mahkamah Majistret Alor Setar, semalam. – UTUSAN/AHMAD SYAHIR KASSIM

ALOR SETAR 24 Nov. – Pembongkaran sindiket dadah antarabangsa ekoran penemuan makmal dadah di Kawasan Perindustrian Mergong, dua minggu lalu oleh pihak polis berjaya mengheret 10 lelaki termasuk tujuh warga asing ke Mahkamah Majistret, di sini hari ini.

Kesemua mereka didakwa atas tuduhan mengedar dadah Methylenedioximethamphetamine (MDMA) dengan anggaran berat 3.45 kilogram yang menyebabkan mereka boleh dihukum mati di tali gantung jika sabit kesalahan.

Warga asing tersebut ialah Jean Jupe dari Perancis, Robertus Cornelis Josephus (Belanda), Anthony David Jeeves (Belanda), Jun Zhang (China), See Chee Kiong, Giam Cheng Hong (Singapura) dan Robert William Balckweel (Britain).

Tiga warga tempatan pula terdiri daripada Lim Kiam Siong, 39, Ung Chii Ming, 29, dan Lim Khai Sian, 24.

Mengikut pertuduhan, kesemua mereka didakwa telah melakukan perbuatan sebagai persediaan untuk mengedar dadah tersebut dengan anggaran berat 3,450 gram yang terkandung di dalam satu tong plastik bertutup hitam.

Kesalahan itu didakwa dilakukan pada pukul 5 pagi, 11 November lalu di sebuah premis di alamat No. 55 Jalan Timur Dua Off Jalan Kampung Batin Kawasan Perindustrian Mergong Barage di sini.

Pendakwaan dikemukakan mengikut Seksyen 39B(1)(c) Akta Dadah Berbahaya 1952 yang dibaca bersama Seksyen 34 Kanun Keseksaan dan boleh dihukum di bawah Seksyen 39B(2) akta sama yang membawa hukuman mati mandatori.

Kesemua tertuduh termasuk warga asing memahami pertuduhan yang dibacakan oleh jurubahasa namun tiada sebarang pengakuan direkodkan.

Pendakwaan dikendalikan oleh Timbalan Pendakwa Raya, Suzanne A/K Tiyon Bimer manakala dua daripada tertuduh-tertuduh terbabit iaitu Kiam Siong dan Chii Ming, masing-masing diwakili oleh peguam Chong Seng Ming dan Dev Kumaraendran.

Majistret Nurshahida Abdul Rahim menetapkan 19 Januari tahun depan sebagai sebutan kes bagi memperoleh ujian kimia dan untuk memberi peluang kepada tertuduh-tertuduh lain melantik peguam.

Akhbar Utusan Malaysia pada 14 November lalu menyiarkan tentang kejayaan pihak polis membongkar sindiket dadah antarabangsa yang didakwa didalangi warga asing di sebuah kilang di Kawasan Perindustrian Mergong dan merampas dadah bernilai RM20 juta.